

## 74-боб. Ўзининг етимини қарамоғига олиб, парвариш қилишнинг фазли



17:04 / 21.01.2020 1816

Набий соллаллоҳу алайҳи васалламнинг завжалари Оиша розияллоҳу анҳодан ривоят қилинади:

«Олдимга икки етим қизини олиб, бир аёл кириб келди. «Бир нарса беринг», деб сўради. Лекин олдимда битта хурмодан бошқа ҳеч нарса йўқ эди. Мен ана шу хурмони аёлга бердим. Аёл хурмони бўлиб, қизларига берди. Сўнг ўрнидан туриб, чиқиб кетди.

Набий соллаллоҳу алайҳи васаллам келгач, бўлиб ўтган воқеани айтиб бердим. Шунда у зот:

«Кимки мана шундай (етим) қизларни қарамоғига олса ва уларга яхшилик қилса, улар унинг учун дўзахдан парда (тўсиқ) бўлади», дедилар».

*Шарҳ:* Бобни номлашда «ўз етимини» дейилишига сабаб шуки, бунда бева қолган онанинг отасиз қолган ўз етим фарзандини қарамоғига олиши назарда тутилган.

Ота вафот этиб кетганидан кейин она етим фарзандларини қаровсиз қўймасдан, сабр билан уларни ювиб-тараб, боқиб катта қилса, жуда катта савобга эришар экан ва ана шу фарзандлари, уларга қилган хизматлари қиёмат куни дўзахдан парда бўлиб, уни сақлаб, тўсиб қолар экан.

Ушбу ҳадисдан олинадиган фойдалар:

1. Муҳтож киши бошқалардан «Бирор нарса беринг», деб сўраши мумкинлиги.
2. Муҳтожга бир дона хурмо бўлса ҳам бериш кераклиги.
3. Онанинг фарзандларга меҳри ва адолати намунаси. Бир дона хурмони ўзи емасдан, қизларига тенг бўлиб бергани.
4. Етим қизларни қарамоғига олиб, уларга яхшилик қилиш дўзах ўтидан парда бўладиган амаллардан бири экани.
5. Набий алайҳиссалом ва у зотнинг оилалари қанчалар содда ва камтар яшагани.

**«Одоблар хазинаси» китобидан**